

辛巳 上御朝講○憲府啓曰凡軍功有大小輕重外竅直犯我國勢甚猖獗而能敵愾歟滅則酬之重賞固不濫矣雖犯我國無異狗鼠之偷竊而邊將舉十倍之兵不勞斬獲則是雖不可謂無功而論以重賞則過矣至於海賊逢風失勢漂到我境則雖以寡敵衆殲盡無餘論其功勞猶有間於斬獲犯境之小賊而況與敵愾殲大賊者同科乎朝廷痛憤湖南之變凡斬獲倭奴者不問大小輕重而錄於一等則例施重賞今者慶尚左兵使方好智以一道之兵捕獲漂到乞降之倭而論以軍功一等陞授嘉善重加爵賞之濫莫甚於此茲徒無以勸功反啓邊將僥倖生事之心物情極為未便請方好智嘉善加改正答曰近年倭寇之害非輕如此之時所當重賞邊功以勸後人而方好智專捕倭船三隻矣有其功與崔終浩崔豪無異不可有前後輕重也且雖曰捕獲漂到乞降之倭以非自破其船登陸乞降之比豈可如是論之乎固不可改之不允○上御夜對癸未 上幸昌德宮問安于 聖烈仁明大王大妃殿○夜坤方如火氣黃海道載寧雷動